

TEZĂUR LITURGIC

11 MARTIE

ACATISTUL SF. CUVIOS ALEXIE ȘEPELEV DE LA GOLOSIEV



MOSCOVA, 2000



Акафист

преподобному

Алексию Голосеевскому

Кондак 1

Избранный угодниче Христов и претеплый о нас пред Богом заступниче, пастырю добрый и учителю благочестия; кротостию и терпением, любовью и щедродаянми аки светило просиявый, хвалебное пение восписуем ти, чтущии святую память твою. Ты же, яко имеяй велие дерзновение ко Господу, от всяких нас бед и скорбей свободи, да зовем ти: Радуйся, преподобне отче наш Алексие, дивный молитвенниче и богомудрый наставниче.

Икос 1

Ангели и праведных души на небесех о тебе, блаженне отче, возрадовашася, ангельский бо чин восприявши, ангельское житие явил еси, душу твою ризою добродетелей осенил, словом и житием верныя наставляя. Сего ради с умилением взываем ти сице:
Радуйся, Воронежским архипастырем Антонием, яко Божий слуга предреченный.
Радуйся, в древнем Киеве - граде на святую

Пасху рожденный.

Радуйся, рождением твоим исполненный обетование.

Радуйся, заповедям Христовым усердное послушание.

Радуйся, священства, иноков и мирян преискусное окормление.

Радуйся, Лавры Печерския и обители сея святое украшение.

Радуйся, преподобне отче наш Алексие, дивный молитвенниче и богомудрый наставниче.

Кондак 2

Видя голубиную кротость и доброту души твоя,
Человеколюбец Господь избранным сосудом
Своим сотвори тя и дарами Духа Святаго
ущедри преизобильно. Ты же молитве и службе
Божией бодренно прилежал еси и ум свой
богомыслием возвышая, присно воспевал
Господеви ангельскую песнь: Аллилуиа.

Икос 2

Разум богодухновен имея, преподобне отче,
измлада вся красная мира сего презрел еси. Сия
ведуци блаженный старец Феофил, узрев тя
отроча богоизбранное в ограде Китаевой
пустыни, иноческий путь предуказа ти, и
провидя, паки пронарече яко быти тебе

Христовым служителем. Мы же, дивящиеся сим чудным обетованиям, умиленным сердцем вопием ти:

Радуйся, святителем Митрофаном, аки звездою светозарною ведомый.

Радуйся, промыслом Божиим немотою пораженный.

Радуйся, благочестие матери твоея Марии восприемый.

Радуйся, сладость попечения и заботы о ближних вкусивый.

Радуйся, воинскаго поприща царя земнаго избегнувый.

Радуйся, на стезю доблестнаго воинства Христова управленный.

Радуйся, преподобне отче наш Алексие, дивный молитвенниче и богомудрый наставниче.

Кондак 3

Сила любви Божией проявися на тебе, преподобне отче Алексие, егда избавлен был еси Господом от недуга. Скорбящей матери о твоей немоте повеле святитель Киевский Филарет уповати на Бога, усердно молиться и раздаяти милостыню. Послежде в день Пасхи Христовой приити со отроком в его келейную церковь, дабы вкупе с народом Божиим, укрепляясь надеждою, воспети воскресшему Спасителю:

Аллилуиа.

Икос 3

Имеяй в душе упование истое на Иисуса Христа, премудрый Алексие, исцеление чудесне приял от Воскресшаго Господа: по скончании бо бдения благослови тя крестом архиерей Божий и повеле святительскую его палицу облобызати, абие же по трикратном Пасхальном приветствии владыки «Христос Воскресе!» отверзостася твоя уста, дабы велегласно отвецевати «Воистину Воскресе!». Темже и мы, благодаряще Господа за таковые милости, воспеваем ти сице:

Радуйся, в скорби сиротства щедроты Отчия обретый.

Радуйся, со тщанием послушанию в Лавре прилежавый.

Радуйся, старцев святых окормление яко многоценный бисер приявый.

Радуйся, аввам преискусным себе до конца предавый.

Радуйся, ум твой изрядными знаниями обогативый.

Радуйся, и душу свою незапятнану страстьми сохранивый.

Радуйся, преподобне отче наш Алексие, дивный молитвенниче и богомудрый наставниче.

Кондак 4

Бури греховныя избежав и страстей буйныя волны безвредно прошед, преподобне отче Алексие, в благоотишие послушания водворился еси, разделяя труды со святителем Киевским в раздаянии милостыни неимущим. Нищии же и убогия возвеселившись воспеваху Богу:
Аллилуиа.

Икос 4

Слышал еси, отче Алексие, дела милосердия и труды благочестия Святителя Николая и пламенно подражати ему возжелал еси. Темже, добронравное отроча, с архипастырем Киевским посещал еси дома убогих в нощные часы, тайно милостыню творя. Мы же, дивящеся сему достохвальному твоему послушанию, ублажаем тя сице:

Радуйся, от утра жизни твоея благое иго Христово на рамена приемый.

Радуйся, злато во черви по слову архипастыря вменивый.

Радуйся, вдов и калек милостивное снабдение.

Радуйся, душеспасительнаго нестяжания верное зеркало.

Радуйся, опечаленным и скорбным утешение выну приносящий.

Радуйся, сляцаемых тяготами неждеваемою

любовию Божией укрепляющий.

Радуйся, преподобне отче наш Алексие, дивный молитвенниче и богомудрый наставниче.

Кондак 5

Богохранимая обитель Лаврская возрасти тя, яко в объятиях матерних. Обаче новое сиротство постиже тя, отче Алексие, егда благочестивии пестуны твоя старец Парфений и архипастырю Филарете ко Господу отыдоша. Но, напитанный благоуханным цветом духовных их наставлений, ты смиренно нес послушания монастырския, поя Вседержителю Богу:
Аллилуиа.

Икос 5

Видя юношу, восходящаго лестницею Богоугождения, потщался исконный враг кознями и прельщеньми восхитити тя от святыя обители, послав жену некую испытovati твою ревность ко Христу и целомудрие. Ты же юродивым странником Иоанном Босым благовременно увещанный бегати женского полу яко огня, вся прилоги лукаваго змия отринул еси, чаемого же иноческого подвига сподобился еси. Сего ради, дивящися юношеской крепости и незаблудному разуму твоему, вопием ти таковая:
Радуйся, вся скорогибнущия блага мира

презревый.

Радуйся, душею к сокровищам неветшающим прилепивыйся.

Радуйся, целомудрия и чистоты страже недремлющий.

Радуйся, в скорбех и искушениях адаманте несокрушимый.

Радуйся, честныя мощи Печерских угодников с любовью лобызавый.

Радуйся, в Селениих Горних с ними ныне веселящийся.

Радуйся, преподобне отче наш Алексие, дивный молитвенниче и богомудрый наставниче.

Кондак 6

Проповедник добродетельного жития явился, преподобне: кротость, незлобие, смирение в сердце твоём добре насадил еси. Темже, видяще твое усердие и духовное преуспяние, чиноначалия обители удостои тя сана иродиакона. Сам же святитель Николай в благознаменитый день праздника своего повеле вне чреды облещи тя благодатию священства. Да сподобишися совершати Безкровную Жертву и непрестанно Господеви воспевати песнь хвалы: Аллилуиа.

Икос 6

Возсиял еси, богоугодным и ангелоподобным житием твоим, святе Алексие, егда ризничное послушание благоговейно несл еси, в воздыханиях слезных и молитвенных бдениях дни и нощи препроважда, темже Печерским угодником уподобился еси, их же святыя мощи блюдя со тщанием, ежегодно переоблачал еси. Мы же, почитающе велии подвиги и труды твоя, глаголем сице:

Радуйся, чудныя добродетели благоискусно стяжавый.

Радуйся, святителя Николая покровительство снискавый.

Радуйся, угодником Печерским служителю верный.

Радуйся, благодатию Божию изобильно напоенный.

Радуйся, убогих паломников благодетелю теплейший.

Радуйся, в уделе Богородицы шафран процветший.

Радуйся, преподобне отче наш Алексие, дивный молитвенниче и богомудрый наставниче.

Кондак 7

Хотя достойно заповеди Господни соблюсти, себе ни во что вменял еси, смиреннейший

боголюбче. Обаче, служа у престола Божия в священном сане, преславных видений пред Святыми Дарами сподобился еси: старца бо юродивого Паисия лик узрел еси светозарным, яко же Мотовилов преподобного Серафима Саровского осиянного видех. Сему мы, грешнии, чудяхуся поем Богу: Аллилуиа.

Икос 7

Новых грозных испытаний на державу Российскую пришествие проразумел еси, досточудне Алексие, егда Господь откры тебе императора Александра грядущую кончину. В день бо оныя, священную проскомидию совершающе, обрел еси, преподобне, частицу за царя исторгнутую не светлой, но аки вином напитанной, и исполнился скорби, уведев Государя убиение. Сим велиим знамениям дивящися, воспеваем ти сиче:

Радуйся, сокровищами неизглаголанными Духа Святаго исполненный.

Радуйся, яко земля благая, плод сторицею произрастивый.

Радуйся, всяк путь неправды возненавидевый.

Радуйся, стопы своя по словеси Господа направлявший.

Радуйся, орле, ум свой от земных к небесным возносивший.

Радуйся, Божественного Света сияние неугасимое.

Радуйся, преподобне отче наш Алексие, дивный молитвенниче и богомудрый наставниче.

Кондак 8

Странника, взыскующего тесных врат и подъявшего крест равноангельного подвига, невозможе терпети тя древний человеконенавистник и, явльшися ти в некий день у раки Исаакия затворника, идеже мощи святаго переоблачал еси, устрашити восхоте: тьма бо згустися окрест, и глава сего змия, непрестанно многия зверовидныя зраки приемлюще, из пасти огонь источаше. Обаче ничесоже достиже лукавый, представ пред тобою и рекл: «Ты мене своим смирением побеждаеши...». Мы же, дивящися твоему мужеству, вопием дивному во святых Богу: Аллилуиа.

Икос 8

Весь горя злобою, воздвиже на тя, преподобне, диавол двух девиц-сестер, внеуду благочестивых, внутрьуду же коварных и неблагодарных. Лжу бо и хулы начаша глаголати на тя, святой отче, и безчинства творити в Велицей Церкви, егда ты в оней служил еси.

Видя сию брань от дерзких жен производимую, удалиша тя Лаврское начальство в Спасо-Преображенскую пустынь. Мы же, почитая скорби твоя, и дивящися кротости и смирению умиленно взываем сице:

Радуйся, в Велицей Церкви, «небеси подобной», жертву Богу приносивый.

Радуйся, исконного врага смирением и кротостию победивый.

Радуйся, мглу неправды светом любви Христовой разгнавый.

Радуйся, крине, от прилога лукавого неврежденный.

Радуйся, безчестия и досаждения безропотно претерпевый.

Радуйся, златица, очищенная огнем искушений.

Радуйся, преподобне отче наш Алексие, дивный молитвенниче и богомудрый наставниче.

Кондак 9

Вся ведши ко Христу, благодати и смиренномудрия преисполнен был еси, блаженне отче Алексие. Бисере бо многоценный обретаху в тебе братия Голосеевския пустыни, имже Господь дарова тя на многая лета, яко чадолюбивого отца и присногорящую лампаду Святаго Духа. Ныне же мы, святыя мощи твоя почивающие зде лобызая, возносим Богу

благодарственное пение: Аллилуиа.

Икос 9

Витии многовещаннии невозмогут изрещи,
преподобне отче Алексие, похвалы высоте
доброплодныя души твоея. Святителем бо
Петром Могилою содеянную в глухоманных
дебрях пустыню прославил и облагоухал еси
подвигами твоими, великий угодниче Христов.
Сего ради воспеваем ти сице:

Радуйся, кротость и смирение в душах
насаждавший.

Радуйся, пользе страданий и терпению учивый.

Радуйся, яко странных прелюбезно и усердно
питал еси.

Радуйся, яко убогим щедро милостыню раздавал
еси.

Радуйся, постниче сугубый, тем, «что Божия
Матерь дает», насыщавыйся.

Радуйся, земный ангеле, люботрудно и в
старости маститей подвизавыйся.

Радуйся, преподобне отче наш Алексие, дивный
молитвенниче и богомудрый наставниче.

Кондак 10

Спаси хотя овцы твоя словесныя,
любвеобильный пастырю, деннонощно бдел еси
стрегущи стадо духовное, душу свою по

заповеди Иисуса Христа положить готовый: да не изгибнет кая овечка во тме от хищных волков. Сего ради и мы, на предстательство и помощь твою уповая, вопием Богу: Аллилуиа.

Икос 10

Стена и прибежище неборимое к тебе притекающим был еси, отче Алексие, молитвы бо твоя великая сила и до преисподней достигала еси. Чадо бо твое духовное Иоанн, преслушав совета отчего поговети и причастится ко дню своего Ангела, внезапно утопе в Днепре и абие, в сонном видении явльшися, умолял тя свободити его от блудного греха, яко связан есть лукавыми духами. Ты же, милостивый отче, разрешительную молитву сотворше, избавление юноше оному даровал еси. Сему велию чуду дивящися во умилении взываем:

Радуйся, благодатию Божию вся взывающие к тебе одождивый.

Радуйся, загробную участь духовного чада во спасение преложивый.

Радуйся, кокош, православных от вражиих когтей укрывающий.

Радуйся, обильныя слезы покаяния дарующий.

Радуйся, безчисленныя разрешивый недоумения.

Радуйся, впадших в нечестие благое вразумление.

Радуйся, преподобне отче наш Алексие, дивный молитвенниче и богомудрый наставниче.

Кондак 11

Пением всеумиленным и хвалением ублажати тя, старче Алексие, достойно есть. Ты бо крепкий предстателю за живых и мертвых явился еси. Понеже и святии познаху силу благомоощных молитв литургийных тобою творимых: святитель бо Феодосий, явльшийся ти во граде Чернигове, заповеда поминати на проскомидии родителей своих. Сего ради, с верою и любовью почитая память твою, вопием Богу: Аллилуиа.

Икос 11

Светом божественным просвещаем, угодниче Божий, грядущая, яко настоящая и дела людския греховныя зрел еси. Не утаися от тебе, духовного отца, и послушник Николай, егда тайно на гору Афон удалитися возжелал еси. Упредивше же самочинное желание, ты юношу сего к покаянию слезному привел еси и такожде скорое возвращение русских иноков со Святой Горы предрек еси; таковому дару прозорливости чудяхуся, глаголем ти сицевая: Радуйся, людских судеб тайнозрителю.

Радуйся, сокровенных пороков обличителю.
Радуйся, игуменство матушке Евфалии за седьм
лет преуказавый.
Радуйся, сроки живота многих человек
предведый.
Радуйся, киевских архипастырей до одра
смертного окормлявший.
Радуйся, митрополита Владимира-
священномученика отрадо.
Радуйся, преподобне отче наш Алексие, дивный
молитвенниче и богомудрый наставниче.

Кондак 12

Благодатию Божиею свыше осененный,
преподобне отче, знал еси день отшествия
твоего ко Господу и известил о сем братию.
Такожде расточил еси скудное имение свое с
любовию и увещаниями. Настави и нас на стезю
спасения, да сохраним сердца неврежденны от
стрел и сетей вражиих и в сиянии
присносущного света в чертог Вседержителя
внидем, поюще Ему: Аллилуиа.

Икос 12

Воспевающе праведное и многочисленное житие
твое, отче Алексие, ублажаем твоя молитвенныя
бдения, милосердныя щедродаяния,
благодарное несение скорбей, унылых и

неможных душ ободрение и восхваляем тя
сице:

Радуйся, лучами подвигов монашеское житие
озаривый.

Радуйся, Христу возлюбленному душу блаженно
предавый.

Радуйся, Царствия Небесного и славы вечныя
наследниче.

Радуйся, преподобных и праведных веселия
сопричастниче.

Радуйся, яко всем дары целебныя щедро
изливаеши.

Радуйся, яко град и отечество наше присно
защищаеши.

Радуйся, преподобне отче наш Алексие, дивный
молитвенниче и богомудрый наставниче.

Кондак 13

О, пречудный и блаженный угодниче Христов,
преподобне отче наш Алексие! Приими
милостивно сие малое похвальное пение, от нас,
недостойных, обаче с любовью чтущих тя.

Умоли, преподобне отче, Создателя и Спасителя
нашего избавитися нам от всяких бед и
напастей, веру правую укрепи, мир, тишину и
согласие в сердцах утверди, крест скорбей
земных помози в благодушии понести, вящше
же сих Царствие Небесное улучшить испроси, да с

тобою вкупе сподобимся вечно пети Господеви:
Аллилуиа.

(Сей кондак глаголи трижды, а по сем читается
икос 1 и кондак 1)

МОЛИТВА

О, богоблаженне угодниче Божий, преподобне
отче наш Алексие, Голосеевския пустыни
похвало и пажити Богоматери предивное
украшение! Ты, славный угодниче Христов,
добре подвизался еси в трудах, постех, во
смиранных молитвах и неусыпных бдениях.
Темже, с верою и умилением припадая к раце
честных, цельбодательных мощей твоих, молим
тя: помози благовременно омыти слезами
покаяния грешныя души наша и мирныя
христианския кончины удостоитися чадом
твоим. Испроси нам у Господа, богомудрый
пастырю, избавления от душевредных страстей
и немощей телесных, утверди нас в духе любви,
терпения, милосердия, щедрости и ревности ко
спасению ближних.

Ей, великий старче и угодниче Божий! Не даждь
нам впасть в уныние от тяжких искушений,
горьких скорбей и хитросплетенных козней
лукавого. Сохрани Святую обитель сию и души
наша от тлетворного дыхания мимолетного века
сего. Да сподобимся благомошным ходатайством

твоим наследники быти вечных благ и причастники присносущныя радости во Царствии Господа нашего Иисуса Христа, Емуже со Отцем и Святым Духом подобает слава, честь и поклонение во веки веков. Аминь.

